

## CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE BOBORÁS PARA O PROXECTO DE EMBECEMENTO DA TRAVESÍA DO IGREXARIO, NO CONTORNO DE PROTECCIÓN DA IGREXA E DA CASA REITORAL DE ALBARELLOS

O xerente de Turismo de Galicia

### DECLARA:

Que esta Axencia Turismo de Galicia formalizou co Concello de Boborás o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2023.

Que o instrumento convencional ten por obxecto establecer as bases de colaboración entre a Axencia Turismo de Galicia e o Concello de Boborás para a renovación da travesía principal que comunica o núcleo rural do Igrexario con Abelleira, así como o acceso á igrexa de San Miguel de Albarellos, mediante a renovación do pavimento así como a colocación das canalizacións necesarias para o futuro soterrado da liña eléctrica de baixa tensión, iluminación pública e telecomunicacións.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en



relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade galega.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** O Concello de Boborás é consciente de que o seu Patrimonio é o seu máis grande ben, entendendo Patrimonio no seu senso máis amplo, é dicir, o conxunto de bens dunha comunidade, incluíndo nese conxunto tanto os bens herdados como os de nova adquisición, tanto os naturais como os culturais. Partindo desta base o concello de Boborás está levando a cabo, dende fai anos, unha serie de iniciativas cun obxectivo común: por en valor, é dicir, rendibilizar o seu Patrimonio para dalo a coñecer, conservalo e para a promoción turística.

O principal obxectivo do presente proxecto é a procura da rendibilización sociocultural da travesía que vertebra o núcleo de Albarellos, mediante a renovación do pavimento e a mellora das infraestruturas municipais. O estado actual da dita travesía non se corresponde adecuadamente co tipo de espazo público do que se trata, e o grao de protección co que conta, xa que se atopa dentro da área de protección da casa reitoral e da igrexa de San Miguel de Albarellos. Esta última trátase dun templo ergueito en tempos do Barroco (ao redor de 1614) con fachada principal realizada no século XIX. O interior da igrexa presenta planta de cruz latina con teitume abovedado e cruceiro con cúpula central. Pola contra, a súa proxección exterior mostra unha base de tipo octogonal, o que provoca que a cuberta semiesférica sexa dun menor tamaño que a propia base exterior, finalizada por un alongado pináculo central. A data de 1819 que se pode ler na propia base da cúpula, coa Cruz da Orde de Malta no seu interior que alude á dependencia que mostra esta igrexa con respecto ao Encargo de Pazos de Arenteiro, documenta cronoloxicamente esta peculiar cuberta, obra do Mestre Pedro Parada.



**Terceiro.-** A actuación atópase dentro do trazado do camiño Miñoto-Ribeiro que é un dos camiños máis antigos que enlazaban o norte de Portugal coa cidade de Santiago de Compostela, e que transcorren na maior parte do itinerario a través de carreiros, calzadas romanas e camiños medievais. Este camiño, que xa conta cunha ampla investigación científico-histórica, atópase en proceso de ser declarado como vía cultural pola Dirección Xeral de Patrimonio da Consellería de Cultura, paso previo á súa homologación como un novo camiño de Santiago, destacando ademais a súa proximidade ao xacemento arqueolóxico do Castro de Meimón.

Tamén forma parte do roteiro do viño do Ribeiro, situada na zona occidental da provincia de Ourense, nas confluencias dos vales formados polos ríos Miño, Avia, Arnoia e Barbantiño. Trátase da Denominación de Orixe (D.O.) con maior traxectoria histórica de Galicia, e a súa distribución, a diferenza doutras D.O., non establece subzonas.

Con esta actuación quérese potenciar un elemento patrimonial do concello, favorecendo o uso e goce do entorno por parte de veciños e visitantes, revalorizando o patrimonio e fomentando o turismo patrimonial como un instrumento de reequilibrio territorial, o que supón a posta en valor turístico da citada infraestrutura.

Que a través deste convenio, outórgase ó Concello de Boborás unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos



contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

O xerente de Turismo de Galicia

Antonio Casas Calviño

